

Lés dirats

Lai sâ de not' bé laindiaidge.

An dit qu'lai sâ de not' jurassienne tiulture ç'ât l'patois. Dâli, i muse que lai sâ de not'patois s'trove dains lés dirats... Cés p'têtes seinteinces qu'an piaice dains l'djasaidge po bèyie de lai tieulèe, po aimusaie lés dgens, nôs v'niant an ne sait'pe trop dâ laivoù. An n'sait'pe lo pu s'vent tiu ât-ce que lés é dits en premie, mains èlles aint lai vie dure. An ne lés rébie pe, craibîn poûeche que, mine de ran, èlles raip'lant dés évideinces, tot en f'saint in pô lai y'eçon.

S'aidgeaçaint de not' véye laindiaidge, an dit, pai ésempye, **ç'tu que rébie son patois ébieugit son aiv'ni.**

Fabyes èt proverbes.

È ne pe mâçhaie aivô lés proverbes o lés chitâchions que sont chutôt utilijès po bayie dés y'eçons, po faire lai morale en montrant qu'an ât inchtru !

Dains lés pèssès siecles, tiaind qu'an trovait è r'dire en quéqu'yun d'impoétchant, an lo f'sait aivô dés p'têtes loûenes, dés fabyes, voù lés bêtes aivînt lai parôle èt r'botaient en piaice tus cés que s'craiyînt lés pu foûes. Lo pu coégnu de cés graiyenous de fâbyes feût Jean de La Fontaine. Afaints, nôs en ains tus aippris dés diejainnes.

Pe de croûe'yetè dains lés dirats.

Lés dirats, ç'ât diffreint, çoli n'é'pe de croûe'yetè, ne de v'lantè de s'faire voûere... Çoli bote tot l'monde d'aiccoûe.

Vos éz churement dje oyi çoci : **ç'tu qu's'ât breûlè lai laindye ne rébie'pe de çhiouçaie sai sope** ; an n'lo sairait mâ pare, è pe ç'té-li : **meinme lés pus belles roses virant en grappes-tius** o bîn encoé : **ç'nât ran de diaingnie dés sous, ç'ât de lés voidgeaie...** È n'y é ran de métchaint o bîn **ç'tu que s'en prend s'en sent !**

Dains not' bé patois, è y é achi d'âtres èchprèssions que faint piaigi è oyi, mains é ne fât pe lés pare po dés dirats. En ç'tu qu'ât tchoi en dit : **rouf â dos dain l'mengo** èt en **çtu qu'ât paitchi â paiyis dés tarpies** en dit qu'èl é **britçhè son tchelat...**

Èt chi i m'y botôs ?

I m'seus dit in côp qu'i poéros bîn, c'ment d'âtres aivaint moi, prepojaie in dirat, ran que po m'pèssaie l'temps. Çoli é bèyi : **ç'tu que djûe â sate-moton tchu ènne licorne veut, in djoué, f'ni écoué'nè...** Dâli, niun ne m'é dit qu'i étôs fô o mâ èyevè... En patois, lés p'têtes seinteinces pèssant putôt bîn.

L'micou